

17

HARVARD COLLEGE LIBRARY
FROM THE
HARVARD-YENCHING
INSTITUTE

SEP. 30 1929

~~Ch L 5570.2928~~
A. 7/2928
T 5237.7.2928

明詩綜卷三十九

小長蘆

朱彝尊

錄



雪苑

宋韋金

緝評

姚 涑 一首

涑字維東慈谿人嘉靖癸未賜進士第一歷官

翰林院侍講學士有明山存稟

靜志居詩話文徵仲待詔翰林相傳為學士及楊方城所窘昌言於眾曰吾衙門非画院乃容画匠處此何元朗叢說述之而曰二人只會中狀元更無餘物衡山長在天地間今世豈更有道著姚涑楊維聰者邪聞者以為快心之論然學士嘗與孫太初薛君采高子業相唱和且聞山東李中麓富於藏書特遣其子就學即徵仲去官日躬送至張家灣賦十詩送別比之巍巍嵩華至其贈行序略云自唐承隋敝設科第以籠天下士爵祿予奪足以低昂其人於是天下風靡士無可稱之節者幾八百餘年然猶幸而有獨行之士時出其間以抗於世而天下之人亦罔不高之求之唐則元魯山於宋得孫明復二子豈有高第顯位為可誇哉徒以其矯世不涅之操好古自信之志足以風勵天下而一時

名流皆樂為之稱譽焉耳今之世如二子者誠難其人吾於衡山先生竊以二子比之而衡山之所造則又有出於二子之所未純者先生明經術以為根本采詩賦以為英華秉道誼以為壇宇立風節以為藩垣蓋嘗聞之却吏民之賻以崇孝也麾寧藩之聘以保忠也絕倚頓之游以勸廉也謝金張之饋以敦介也不囁於台鼎之議以遂其剛毅也不恩於輜褭之招以植其堅貞也此數者足以當君子之論而先生未始以為異也聲震江表流聞於天子之庭先生亦烏得而逃哉曩者先生之貢於春官也朝廷錄其賢拔而官之翰苑儒者共指以為榮而先生不色喜官僅三載年僅五十餘先生遽以南歸為念吾每謬言留之而先生持益堅三疏乞歸竟得請以去先生其有悟於達人之指邪嗟夫先生嘗試於鄉矣有司以失先生為恥而先生之名益高嘗官於朝矣銓曹以不能留先生為恨而先生之節益重榮出於科目之外貴加乎爵祿之上爵羅之所不能取繫維之所不能縻樊籠之所不能收彈射之所不能驚翩然高翔如鳳皇之過疏圃飲湍瀨回蒙汜下視泰山之鷄啄腐鼠以相嚇者何不侔之甚也傳所謂難進而易退易祿而難畜者其先生之徒與自大道既濇好惡立於一鄉而不可達於天下之廣毀譽徇於一時而不可合於萬世之公故吾之論先生直以魯山明復為喻而使世之觀先生者不當以三吳之士求之也釋其詞傾倒為何如者而謂學士有是言邪金華吳少君詩說謊定推何太史然則元朗乃好為詛語者虞山錢氏信何氏之說遂不錄學士詩未免偏於聽矣

秋夜偶成

新凉沁苧衣楚客悲遲暮林葉墮寒颼臯禽警清露銀河沒半空秋影在高樹何處洞簫聲吹徧江南路

徐階 十三首

階字子升松江華亭人嘉靖癸未賜進士第三授翰林編修抗疏論孔子廟制斥為延平府推官稍遷浙江江西提學副使入為司經局洗馬歷升禮部尚書入直無逸殿尋入東閣辦事累官少師吏部尚書建極殿大學士卒贈太師謚

文貞有少湖集

少師負物望膺主眷當分宜驕汰之日以精敏自持陽柔附分宜而陰傾之分宜敗

後盡反其軀政卒為名相嘉靖中閣臣如華亭新鄭皆以文翰起家而志在經世不求工於聲律若張桂議禮諸公本非詞臣又勿論也陳卧子云徐公經世之士其詩不專臺閣

詩話先祖妣徐安人為文貞公曾孫余少日登世經堂觀永陵手勅羅
列梁棟間蓋得君久而不衰罕有過焉者當日袁懋中於西內撰青詞
湛元明為鈴山作詩序貽笑士林而公不露所
長讀少湖文集有醇無疵非諸公所易幾矣

感興

烈風振黃塵長夜何颼颼浮雲東南來各有雨雪謀美
人金玉姿煢煢倚高樓寶玦雙明珠欲致道阻修嚴霜
瘁百草荏苒歲已邁寒暑互代謝日月無停輟至理諒
斯存耿耿生百憂冥冥雙飛鴻可望不可求

贈傅神蕭鴻臚

蕭君七年別來自江西溜以彼絕妙手寫我羸頽肌揮
毫捷風雨初不經意為須臾兩徐生竝出當前楣兒童
走相問何以更有茲我笑不為言視久竊自悲容顏醜

如此已見猶惡之旁觀盡才俊何由使愉怡請君為潤
色稍就斌媚姿君怒不復應我亦慚無辭誓終抱此醜
亟訂漁樵期

送考功朋石楊君赴留都

昔人賤榮達今人慕通顯所履非有殊中得異深淺欣
戚緣感生塵幻非實踐望賒情日悲理會境俱遣子年
二十強才器重瑚璉春明去不顧此意昔所鮮因之內
自媿孱鈍玷華選會當理歸楫長嘯謝軒冕

送司封仲芳楊子赴留都

哲人重道義朝貴不足縻丈夫志四方遠適非所悲如
何與子別悵悵不忍辭古道日淪替羣諛紛追隨子獨

明詩綜卷三十九
諒迂僻經訓相劇規去住忽以異麗澤安所資頽波無
停流靈耀亦西馳感此重念子何以慰爾知至理不外
得吾心實吾師願言勵操存千里同襟期

送沈進士子善尹鄱陽

治民如烹鮮此語傳自昔邇來才俊士古訓恥誦習譁
然煩其令藉口興與革遂令田野間奔走廢耕織朝廷
念元元置吏務安輯豈意更勞擾肥身重民瘠沈生起
巍科探討遍六籍况復有家教茲義諒能識鄱陽號樂
土近稍異往日撫摩還富厚夙夜在努力高才如騏驎
千里初發迹康莊與曲徑慎哉審所適

送趙甥赴衛輝幕

汝母子之姊六年長於予予昔生十齡夜燭誦詩書汝
母執女紅竟夕與予俱茲事四十年想像昨日如頭顱
各已白相望天一隅每懷骨肉情中宵起嗟吁春來獲
見汝差足慰煩紆汝今幸有官汝毋當怡愉汝本故家
子書香襲巾裾子衰媿忝竊早晚賦歸歟汝宜兩念此
奉法保民譽祿養儻能久庶報生汝劬舅甥共休戚贈
言不以諛勗哉萬里程夙夜慎所趨

送王國完東歸

春色千門柳歸航兩月塗歲更鄉夢切客去草堂孤會
合期猶阻翻飛意不無瑁湖煩問訊松菊恐荒蕪

送曹一坡判辰州

明詩歸卷三十九
衡嶽已無鴈辰陽吁可知未愁會面阻豫計得書遲屯
戍煩兵力流亡苦歲饑若為宣帝澤遠慰故人期

瓜洲風雨不克渡江

未遂歸來願空驚歲月奔布帆三日雨茅屋數家村山
氣遙連海江聲近到門無緣得飛渡東望欲消魂

送顧起元甥壻之京

病中愁送客况復是殘年雨雪三更夢江湖萬里船天
垂龍塞沒星接鳳城懸到得燕山路應書數字傳

廣信阻雨有懷子明弟

山國夜多雨冥冥氣不分石田寒貯水松逕濕蒸雲灑
密愁仍見聲微醒故聞西堂何處所知共惜離羣

分水關

峻嶺開閩服重關限楚氛星隨分野異地漸燠涼分人
語聽難辨山名得未聞所嗟南逝水不似北歸雲

橫溪為彭允禎賦

橫溪東去水迢迢虛閣重簷共寂寥山外夕陽低度鳥
雨餘春渚暗通潮寒空落葉書聲靜秋草孤帆客夢遙
欲徙西湖湖上石為君乘月更吹簫

潘恩四首

恩字子仁上海人嘉靖癸未進士累官南京工
部尚書改都察院左都御史卒贈太子少保謚

恭定有笠江集

張惟靜云子仁詩型範自然體裁各適已深入
作者堂奧徐伯臣云笠江詩相盛唐充然自

得 王元美云公詩根
祇鄴中間及開元大曆

詩話先大母徐安人為恭定公女孫所出子七齡時塾師課以屬對不
協安人述舊事謂公六歲能調四聲因以公所訂詩韻輯略授子自是
知別四聲矣公詩凡風雅什樂府五言雜體靡不擬又
與高子業田叔禾相酬和知其用力深而取友之善也

塘上行

綠蒲生中池其葉何蒙茸與君締昏媾焉知鮮有終三
月楊柳花飛泊隨春風入沼化為萍吁嗟無定蹤衝波
一相激葉葉自西東我心元不移君情忍中絕妾生禽
不如鴛鴦故成列妾生草不如絲蘿可高揭妾生木不
如連理枝糾結越鳥豈北翥吳江不西旋妾生一以棄
苦相誠可憐恨無奮飛翼委志畢君前

從庾嶺北歸至萬安縣舟中作

嗟余謬時網作吏入西粵飽歷五嶺雲四見梅花發草
樹冬常青嵐霧晝不歇狗祿歎迷方留滯慚英達駕言
適京師歸途嶺初越忽驚險阻盡俯視原隰闊白沙綴
疎星碧水澹華月乘流耳目新破浪精神豁鷗鳥會我
衷飛鳥恣怡悅雖牽行役悲吾躬庶可閱

當陽晚行

山行日有程中路速修軫牛羊夕下來嶺日忽以盡石
滑露華零木號風力緊野燒漸已微疎星忽而隱倦翻
怯途遙迷方憐步窘僕御慘不歡勞生况多疾撫時百
慮煎于役良足憫惜哉絀冕牽久負沮溺哂

湖上

西湖如練風日清西山屏障更分明上方金碧自相映
下界鼓鐘時一鳴槐柳青溪張席罷菰蒲白水放舟行
此時政切東南想怪爾浮雲空北征

鄭曉一首

曉字室甫海鹽人嘉靖癸未進士累官南京吏
部尚書尋以右都御史協理戎政改刑部尚書
卒贈太子少保謚端簡有集

詩話端簡公家法甚嚴遺訓子孫倡優不許入門違者以不孝論解諸
宗譜之外築別業於城東北隅穿池中央四面種蔬藥賓客至者燕於
池上百可亭亭陰有牡丹數本嘗與夫人玩花豚一蹄魚一尾雞子四
枚酒三行而已嗣先妣孺人為公來孫子嘗讀書其地芋魁芥孫豆棚
瓜堰恍若深村今已屬之他姓矣公銳意經史學韻語
不多作然曾刊鳴唐萬選絕句以行非不留心風雅也

彭城

彭城天下險萬里接河源落石東南斷飛濤日夜喧江
淮連絕島齊魯入平原寄語當關者征求無太繁

張時徹七首

時徹字唯靜鄞縣人嘉靖癸未進士授兵部主
事改禮部出為江西提學副使歷福建參政雲
南按察使山東右布政使河南左布政使以僉
都御史撫四川再撫江西遷南京刑部侍郎改
兵部進尚書有芝園集

楊用修云芝園匠意鑄詞色具體
備江于順云唯靜立格漢魏取

材六朝而音節變調出入開寶之間情屬景生神在象外 錢受之云
尚書詩學殖富有工力深重樂府古詩與會標舉時多創獲七言今體
塵空蕪穢若出兩手 陳卧子云司馬樂府頗
有造構近體宛情麗逸如層臺佚女意帶雲霞
詩話芝園樂府不規摹古人較之濟南覺勝
五律頗近初唐七律潦倒麓疎無譏焉已

彭彭者車 五章

彭彭者車于彼河洲有美丹漆不以飾朝彼君子兮使
我心憂一彭彭者車于彼河側矯矯騏驎不以服輓彼
君子兮使我心惻二爾之弦矣衆維韋矣爾之石矣衆
維脂矣匪爾圖之狂維衆之迷矣三矢之既釋不可反
也錦之既張不可卷也我生有定終不可轉也四修爾
疆畎藝爾黍稷保艾爾生夙夜無斁如彼見龍時哉斯

匿五

秋胡行

衆鳥有匹胥遨以遊摯而有別實惟睢鳩彼誰者子矯
矯卿侯突而好我中心孔羞卿有婦兮妾有夫悅彼妹

予曾睢鳩之不如予一解倉庚喈喈春日載陽執我懿

筐采彼柔桑彼誰者子車馬龍驤含情流睇黃金是將
獸有穴予鳥有林卿有金子不如我有心予二解明明

日月照臨下土女子有行畏彼多露彼誰者子繡衣朱
輅美也可悅不念其故山有木兮水有魚子不信兮孰

可與同居兮三解

北征雜詠 二首

養鳥莫養鸞藝麻莫藝蘭芳香難為用過美多憂患田
甲賤死灰白日摧冰山時運有來去禍福無定端周道
蕩如砥朱門競彈冠咳唾生風波誅奪在一言日月不
常盈人生豈得安栖栖巖穴士無為恥泥蟠

羲和無停軌寒暑更相易歲暮誰不歸獨為遠行客荆
榛當路衢烏鳶翔我側疾風吹沙塵白日忽以匿筋骨
既憔悴感此增怵惕悠悠赴壑鱗戢戢歸林翼物性有
如此行役不遑息閭闔不可攀閭風不可即果腹適莽
蒼浩蕩將安極

長安道

月曉一作曙動開長樂風清一作鶯啼遶建章龍媒馳道出鳳吹彩旌

揚繡陌生朱霧銅溝映綠楊渭橋春水漲日日浴鴛鴦

齋居

紫闕風雲迴彤庭日月臨明禋昭代典肅戒小臣心雨
露春偏渥星河夜不沉長安千萬里應獻太平吟

閭闔曲

穀熟不到釜絲成不上身莫道江南樂江南愁殺人

歐陽德一首

德字崇一泰和人嘉靖癸未進士累官禮部尚
書贈太子少保謚文莊有南野集

送胡九峰改太常少卿北上

丹楓江上路送爾倍沉吟南北如相避誰從話此心漸
鴻遵月渚倦鳥怯雲岑孤負溪山約臨風撫素琴

馬坤一首

坤字順卿揚州通州人嘉靖癸未進士累官工
部尚書有石渚集

苦雨

南國春來不肯晴陰雲接地暗山城翻風何事鶴一作鶴雙
下喚雨忽聞鳩一鳴處處蠶飢吳地妾牀牀屋漏杜陵
生鶯花三月空無賴獨掩柴門對短檠

朱廷立一首

廷立字子禮通山人嘉靖癸未進士除知諸暨
縣入為監察御史升南太僕少卿終禮部右侍
郎有兩厓集

杜宇

愁烟積雨過芳辰乍喜濃陰綠樹新杜宇多情啼不歇
山中可有未歸人

吳鵬五首

鵬字萬里秀水人嘉靖癸未進士累官吏部尚
書加太子太保有飛鴻亭集

詩話尚書居里門不自韜晦以是鄉人皆惡之會有詔許佃浮屠廢寺
為民居公子繼輸直於官請佃楞嚴寺隙地且酬僧徒以白金四百兩
因葺野樂園蓋與勢佔者稍有別矣園有堂曰先瀛前為圃曰閒圃曰
猗猗曰忘機曰都春門曰吾如所堂後有樓曰雲日樓前亭二曰漱芳
曰臨賦小沼環之左右齋各一曰悟真曰守虛園成尚書自為作記告
誠其子謂宮室勿崇土田勿闢輿馬勿飾服御勿奢饗饋勿珍執業勿
懈交游勿濫鄉鄰勿競施予勿吝辭受勿苟觀其出言也善方諸席寵
滅義以惡終者亦有間也尚書詩文頗條暢特少警策當在徐沛拯民
之饑截漕糶數萬發之而後請命又敗永城賊師詔
於五河膽略亦有過人者比於吳之陸完差可恕爾

潞河發舟

解纜催笳鼓青春萬里行煙籠提柳密水泛野鳧輕獨
立思王事無才補聖明此心懷魏闕惆悵櫂歌聲

永平道中

疎雨未滑道秋風隨使輶磴危頻下馬溪斷不逢橋板
屋居何陋蒲蠻習更驕暝投孤館宿寂寞聽鄰簫

夫椒山

夫椒山前孤草亭天風颭颭秋冥冥客來獨鶴忽飛去
七十二峰湖上青

舟行雜詠 二首

山花瑣細蒨郵亭小艇漁歸水氣腥一路東風嘶去馬
土牆斜颭酒旗青

驛亭素壁上苔痕亭下奔流淨不渾慣是秋河愁汎濫
漁家偏占白鷗村

屠大山 二首

大山字國望鄞縣人嘉靖癸未進士累官兵部
左侍郎巡撫應天與倭戰失利被逮繫獄既而

釋歸有集

屠長卿云公歸田後與里中故人縱飲酒酣援筆
作歌了不求工而往往神來非詞人嘔心所得

雜詠

古道有疾藜行者戒經過新徑富桃李過客肩相摩古
道日以微新徑日以多江河逝悠悠歎息將如何

聞道

聞道黃河套年來勢不同驚塵昏陝石邏騎薄遼東五
月金符動三軍鐵馬雄何當清絕域再見幕南空

李仁 一首

仁字元夫東阿人嘉靖癸未進士累官右副都

御史有吾西遺橐朱中立云吾西清婉和粹有中唐餘韻

茂欽至得德兆起居

不見黃生久天涯怨索居椒蘭懷楚客冰雪斷江魚白
日登山履青春負郭廬虞卿能發憤會見早成書

李宗樞一首

宗樞字子西富平人嘉靖癸未進士除諸城知
縣徵拜監察御史出為河南僉事歷僉都御史

撫河南

度居庸關

峻壁含雲迴飛湍接澗迴虛聞三峽險疑是五丁開荒

樹分天宇驚沙暗戍臺祇慚持節度豈是棄繻來

劉隅一首

隅字叔正東阿人嘉靖癸未進士授福建道御

史出為四川按察僉事坐謫稍遷永平知府升

河南副使進按察使以右僉都御史巡撫保定

終右副都御史有範東集朱中立云範東意氣安閒辭旨沉快有杜陵遺意

過宿州

憶昔乘輶過霜飛楚甸清十年頻去國此日重合情浦
樹浮烟遠河流入海平山川望不極春草徧王程一作伴孤征

李舜臣二首

舜臣字懋欽一字夢虞樂安人嘉靖癸未會試

第一由戶部主事改吏部歷考功員外郎出為
江西提學僉事改南國子司業轉尚寶卿久之
名為太僕卿有愚谷集孔汝錫云愚谷詩優柔涵泳粹然
一出於正懋欽伯華

才名相頡頏竝由吏部左遷竝以京堂罷免皆為權貴人齟齬伯華縱
酒度曲頹然自放懋卿意經術兩人學業不同而志趣訢合三齊之
士屈指先輩
必稱二李焉

詩話李獻吉有九子詩李伯華仿之亦作九子詩以懋欽為首次以劉
子素又次羅達夫餘則呂山甫熊叔仁唐應德趙景仁王道思潘子抑
也子抑名高太原人王恭襄瓊女壻中嘉靖壬辰進士以翰林編修建
言罷官伯華詩所云貴人懷私憤假公得一逞也又詩云潘君氣最豪
權貴等鴻毛身廢談邊務家貧賣寶刀又云有書過千卷有田不一頃
亦一負奇之士所著春谷集不傳李伯華輯明雋僅錄其一詩而已近
見晉人編仕國人文
竟不及其姓氏惜夫

初度友人過飲

乍喜高軒過還驚短髻催相看俱老大相慰是歸來濁

酒家能釀黃花手自栽今宵踏明月莫惜醉中回

徐錦衣西園

暖日紅芳樹晴烟碧小溪春風二三月定有好禽啼

陸銓 五首

銓字選之鄞縣人嘉靖癸未進士除刑部主事
諫大禮廷杖遷兵部員外轉禮部郎中為張孚
敬所忌出為福建按察副使歷廣西按察使廣

東布政使有石谿集

詩話石谿論詩專以性情為主嘗曰宋人不能為唐唐人不能為漢魏
時為之也其偶似者宋之似唐唐之似漢魏爾故諸體不沿時習五言
如鳥白雲中樹山青雨後峰亂帆爭入浦羸馬怯過橋越竹成游轎吳
蠶吐釣絲七言如山田雨足秋仍熟石室風高夏亦寒絕壁有松人不
到深林無主鳥相忘沙頭水急潮初落山腹烟多雨未收野樹巢空鷺
鶴去淺沙船動覺潮來輕便度嶺雙肩轎小巧穿橋獨櫓舟一別動經

千里闕百年消得幾回忙皆非陳言也至若獄中次季舉之韻
云聖怒不妨爲孝子狂言豈敢託忠臣庶幾哉忠厚之遺矣

民謠

毀我十家廬構爾一郵亭奪我十家產築爾一佳城官
長尚爲役我曲何時直本是太平民今願逐逋客

撥悶

修塗密春雨新水浮磽田灘聲起林杪浦色迷遠天湖
游違水性力挽苦不前歸情逐飛鳥度日長如年前村
靄雲樹望久生夕烟來船翼雙櫓疾若矢發弦勞逸迴
倍屣遲速殊相懸事以乘機易力因失勢捐引觸悟至
理何獨舟行然

湘湖與陳見吾同遊

陳侯慷慨作賦才置酒攜我湘湖隈湘湖去縣十二里
津吏伐鼓廚船開須臾山曠湖風發船頭噴浪聲如雷
酒酣日落鳧鷖亂振衣倚櫂登荒臺人言夫差昔困越
直待烏喙行成迴至今山腳號排馬天風颯颯吹枯葦
十年轉盼似昨日敗軍勝將同灰埃陳侯歸去來
登舟長嘯且銜杯眼前功名亦吳越吳越于我何有哉

再和宣明館陽明先生韻

五色晴江雨後痕亂峰雲氣月華渾邊陲萬里還通驛
盛世深山亦有村興至欲穿雙屐去愁來只對一燈昏
夜郎詩思知多少恐有當年遷客魂

清明

清明日薄晝陰陰籬外新秧短似鍼縛草象人田畔立
借他風力逐飛禽

顧夢圭 五首

夢圭字武祥崑山人嘉靖癸未進士累官江西
右布政使有疣贅集

詩話武祥清約自居有同寒素當參議粵藩賦詩云夏月行部至雷州
思製一葛且復休冬月行部至廉州思製一裘且復休故衣雖穿尚可
補秋毫擾民亦苦胡威之清何以過此呂仲木
擷梅花贈之曰武祥如此花矣聞者以為美譚

擬古

雖雲中鴈八月徂南方念彼北風來怛焉懷稻梁九
月氣已淒十月繁冰霜生成一作來毛羽單高飛不成行君
門有鐘鼓聽之徒自傷

潮縣行

入城半里無人語枯木寒鴉幾茅宇蕭蕭酒肆誰當壚
武清西來斷行旅縣令老羸猶出迎頭上烏紗半塵土
問之不荅攢雙眉但訴公私苦復苦雨雹飛蝗兩傷稼
春來况遭連月雨縣城之西多草場中官放馬來旁午
中官占田動阡陌不出官租地無主縣中里甲死誅求
請看荒墳遍村塢

珠池歎 并序

廉州平江青鸞楊梅池雷州樂民池產珠地也
先朝率十五六年或十年一採始得美珠上供
邇者三年再採珠已竭矣所得皆碎小藩臬有

司竝受詰責不知此物生息甚難取之太頻安
得圓美每採費舟筏兵夫以萬計頑悍之民因
緣為盜今雷廉凋敝已極採取不止將有他虞
余承乏攝此事儻議復採當疏聞聖明必不以
無益害有益也

漢家嬪媵無麗飾南海逍遙養泉客昭陽新寵鬪新妝
照乘之珠苦難得孟嘗美政龔黃班今人反怨珠來還
璽書三年兩頒降驪龍赤蚌皆愁顏往時中官涖合浦
巧徵橫索如豺虎中官去後璽書來誰訴邊陲無限苦
野老村童不著禪四山戎馬夜紛紛竹房無瓦餅無粟
猶折山花迓使君

感事

畫戟門前車馬稀東市灑血沾朝衣中台轉盼無光輝
華亭唳鶴聲哽咽月中空喚行人歸

謁康陵

早霧籠山暝新松匝殿稠三邊餘武烈八駿想神遊花
萼皇情遠衣冠歲事修傷心大官酒猶得獻千秋

高叔嗣 二十二首

叔嗣字子業祥符人嘉靖癸未進士授工部主
事改吏部歷員外郎中出為山西參政終湖廣

按察使有蘇門集

廖鳴吾云詩人之有事於楚者若邊廷實
之冲澹徐昌穀之超逸李川父之脫灑高

子業之奔放咸足被之廣奏登之升歌洋洋乎其盈耳也哉 陳約之
云子業謝絕品流因心師古每有屬綴佇興而就寧復罷閣不為淺易

往往直舉胸臆刮抉浮華存之隱冥獨妙間曠有蘇州之冲澹兼曲江之沉雅體王孟之清適具高岑之悲壯詞質而腴興近而遠洋洋乎斯可謂之詩也已 蔡子木云蘇門詩在我朝當屬第一 李伯華云何李雖是大家去唐却遠蘇門雖云小就去唐却近蔡白石王巖潭以為國朝第一其言雖過要之不可盡非也 王元美云高子業如高山鼓琴沉思忽往木葉盡脫石氣自青又如衛司馬言愁憔悴婉篤令人心折又云高子業空谷之幽蘭崇庭之鼎彝也又云刻羽雕華舍陳而新吾推子業然不能諱其促 王敬美云詩有必不能廢者雖衆體未備而獨擅一家之長如孟浩然泚泚易盡止以五言雋永千載竝稱王孟我明其徐昌穀高子業乎二君詩有不同而皆巧於用短徐似高韻勝有蟬蛻軒舉之風高以深情勝有秋閨愁婦之態更千百年李何有時廢興二君必無絕響 吳明知云獻吉仲默竝策上駟而馳中原子業雖駘駕第緩轡後至耳 劉仞叔云蘇門思悟入玄詩在晉魏初唐之間 顧玄言云參政詩若磊磊喬松凌風迴秀響振巖谷 胡元瑞云高子業視李何後出而其五言之工不欲作今人一字在唐不減張曲江韋蘇州矣又云弘正五言律自李何外如薛君采之瀟灑温醇高子業之精深華妙置之唐人毫無媿色然二君俱不能為七律高蓋氣局所限薛由工力未加 黃清甫云高詩綽有意見不假緣飾吐言成章誦之若落落直致而中自豐腴 馬仲良云羊孚有言資清以化乘氣以霏遇象能鮮即潔成輝四語可画一子業也 范介孺云子業多漸連之致惜未竟其詣 子業少受知於李獻吉弱冠登朝薛君采一見歎服詩以清新婉約為宗未嘗登壇樹幟與獻吉分別淵澠

固已深懲洗拆之病而力砥其膏肓矣其意微見於讀書園彙序中約之為疏通證明暢言其脈絡世之君子墮落北地雲霧中懵不知返亦可以爽然而悟矣 陳卧子云子業沉婉雋永多獨至之言讀之如食諫果味不驟得又云子業詞存清曠意成淒楚 李舒章云子業如疎林清磬聽者振衣

詩話嘉靖初後生英俊稍稍厭棄李何子業以吏部郎謝病歸時獻吉留開封辭必摹古子業自序讀書園彙謂本非所長而強力慕之度必取調於衆其立意固殊讀其詩如食哀家梨止渴雖爽而不伐性如以水精盪進酒雖薄亦能醉人李中麓六十子詩於子業有云蘇門能入室何李只升堂其傾倒也如此

古詞

荆和當路泣良璞為誰明
茫然大楚國白日失兼城
燕石十襲重魚目一笑輕
古來共感歎今予益吞聲

再調考功作

引疾三上書微願不克諧
徙官復在茲心迹一何乖
軒

裳日待旦閭闔凌雲排入屬金馬籍出與羣龍偕積賤
詎有基履榮誠無階但惜平生節逾久浸沉埋既妨來
者塗誰明去矣懷鳥迷思故林水落存舊涯唯當尋素
業歸卧守荆柴

益藩漢南云委
婉非俗客能道

秋情

涼風吹庭樹蕭然已暮秋歲運空云往客行胡久留良
時每易失微志果難求餘光儻可積但空成山丘

病起偶題

空齋晨起坐歡遊罷不適微雨東方來陰靄倏終夕久
卧不知春茫然怨行役故園芳草色惆悵今如積

雨中簡子仁員外

積雨曠朝暮層城苦沉沉端居誰與言抱此懷人心
為軒冕拘遂便名跡侵長媿玄豹姿隱霧南山岑君通
微妙理佇想開塵襟

簡袁永之獄中

本同江海人俱為軒冕誤子抱無妄憂余有多言懼昔
來始青陽今此已白露豈乏速進階苟得非余慕罪至
欲何言直以愚慵故衆女競中閨獨退反成怒追誦古
時人蒙冤誰能愬皇心肯照微與子齊歸路

元日同谷子延賦

雄都盛賓客車馬爭馳騫芳辰啓初年宴飲多所務不
知灌園身何為迷方誤郊館抗空壑山扉啓峻路良朋

平生歡就我今朝步城因竝舍登徑爲穿林度微陰原
上明片日雲中霧青霞照深池白雪停幽樹共貪歲欲
新不厭日旋莫農田方在茲君豈數能顧

益王潢南云
造語精綺

敘懷

生長夷門郭往來莘野路家貧無良謀躬耕有遠慕始
窮伯王略遂覽生民故曰余本空疎當年恣高步慶彼
鳴鶴期忝此飛龍顧亦知敝帚材早享千金誤日月不
我留撫心慙往素

益王潢南云
辭意俱古

移樹道上

春園就蕪穢雜樹生蒙密不知雨露功長養何多術婆
娑使人憐斬伐終余恤乘時聊徙植于以託吾室交生
兩相當列映直如一轉令門巷新遂放雞豚出修修原
上風團團村邊日紛吾本蹇劣兼爾抱憂疾敢學成都
桑而謀荊州橘願及垂陰成初志儻此畢

歸次南關驛

祇役忽于今徑塗宛如昨秣馬息荒林振車越重壑歲
暮滯還期客心悵不樂曰予本沉冥遭時乃獲落化海
異微禽蟠泥豈尺護方因遷斥餘始遂歸來諾逝將入
雲峰滅迹從所託

送別德兆武選放歸

燕郊秋已甚木葉亂紛紛失路還爲客他鄉獨送君罷
歸時共惜棄置古常聞莫作空山卧令人望白雲

春夕同李考功道舊

下馬春庭夕明燈夜雨深人多新歲感日有故園心磨
滅名題柱淒涼賦賣金十年同省舊誰念各如今

賦得嶧山碑送李東升明府

秦皇千載後嶧嶺尚遺碑斷石青山路孤城滄海濱蕭
條餘霸氣磨滅想雄辭君到鳴琴暇應多弔古思

得張子家書

晚日照餘晴荒亭暗復明歸雲度深樹飛雨過高城蹇
劣慚當代棲遲笑此生空持一書札長歎故人情

雨後有懷子延

驟雨新秋晚微晴墟落間悠然抱藜杖率爾倚柴關空

壑纔容水流雲故滿山遙知城市裏應羨此身閒

西園再酬谷子延

茅屋還相見冬郊那可聞荒城連凍浦落照與寒雲遠
樹行時倚歸塗到處分留君終日語猶自日思君

武城漕河逢張使君憶考功舊寮

岸坼留餘照舟行稱晚風歸心千里倦行役一時同置
酒滄波上停橈綠樹中思君如河水何日不朝東

送別蕭司勳

柴門夜語罷惆悵出前林曉日孤村映秋風落木深別
來生白髮歸去換愁心還復茅檐下朝朝烏雀吟

井陘道中

曉霜塗屋重寒日出林微改轍辭邊徼登車望帝畿深
山藏驛道巨壑斷村扉欲問前征侶迷津何處歸

晚趨忻口

雲峰聊極目立馬獨愁心豈直關山遠其如雨雪深笳
聲先入夜邊氣迴生陰疇昔長征意蹉跎力不禁

沁州張源舖

去國三年意還家此日心天寒客路永日暮衆山深沙
塞人偏老風霜馬不禁如何更萬里投跡楚江陰

送管平田先生頒封秦府歸省

五等周分國三王漢世家日聞敦帝族時見遣皇華剪
土仍鶉首疏邦自犬牙秦關通使節灞水渡征車過邑

恩難屢登堂禮更嘉何如北山客行役動長嗟

葉份一首

份字原學婺源人嘉靖癸未進士歷官山東提

學副使有蓮峰集

汪禹乂云原學詩
平妥中有逸思

夜泊壽春驛

萬里愁行客孤槎自使星人烟昏晚渡漁火亂風汀桐
柏長淮水松杉古驛亭誰家吹短笛淒斷不堪聽

周易一首

易字時伯蕪湖人嘉靖癸未進士歷官提學副
使有赤山集

春眺兼簡楊石巖

野曠春猶淺山明雪正殘楚雲棲樹濕淮雨過江寒酒
醒頻看劍愁深獨倚闌客從天上至猶道未回鑿

陸冕 二首

冕字宗周崑山人嘉靖癸未進士除禮部主事

歷官陝西按察副使

周子籲云宗周律已
廉介詩雅健清古

西夏曲 二首

秦關百二古稱雄寧夏山河襟帶同天險皇圖元自固
從前失策自和戎

校獵河西日未曛縱金伐鼓動風雲還軍飲馬長城窟
野馬黃羊各百羣

韋商臣 一首

商臣字希尹長興人嘉靖癸未進士除大理評

事疏救議禮諸臣廷杖謫靖江縣丞累遷四川

參議有南苔集

詩話南苔世為廉吏時以比胡威父子歸田後與蔣恭靖瑤劉清惠麟
孫僉事濟蔡同知玘唐主事樞陳參政良謨顧尚書應祥吳太僕龍朱
太守懷幹張通政察施知州佑李知縣丙吳副使麟參政龍一十五人
結峴山逸老之社雖饋饗不給而春秋必赴能不改其樂云父厚字原
載中成化丁未進士仕至黃州同知有翠屏詩集不傳
雪峰者名雲鳳烏程人官刑部主事蓋續入逸老社者

秋社和朱雪峰韻

近圃青千疊遙山碧四圍舟從天際至觴向雨中飛殘
暑蒲葵扇新涼薜荔衣更憐天欲霽返照弄餘暉

鄔紳 一首

紳字佩之丹徒人嘉靖癸未進士有中憲集

寄汪水部淵之

憶昔河梁別春華委芳樹流光何迅速
朱夏忽云暮園林莎雞鳴檐隙疎螢度
向晚輟簿書中庭浥微露搔首重踟躕
無亦以君故使者舒城來多君眷南顧
遺我先春開我以尺素殷勤報秋期江
皋諧夙晤我欲往問之蒼波渺烟霧悵
望寂無言鳴琴寫情愫

陳 襄 一首

襄字邦進寧德人嘉靖癸未進士有騶山集

燈花

倦矣經年客歸與萬里家遠書期不至空自卜燈花

馮世雍 一首

世雍字子和江夏人嘉靖癸未進士歷官徽州知府有三石橐

赴滇南煙莊道中

碧嶂千峰合黃茅一徑開馬從危石度人自亂山來
暝樹青溪濕寒雲白鴈哀漫停湘浦駕遙望漢江臺

劉汝松 一首

汝松字貞吾歷城人嘉靖癸未進士歷官知府送李進士之京

春風吹岐路朝日照高城青陽旣駘蕩林薄亦芬榮
之子去安適迢迢入承明皇居一何麗雙闕凌太清
白馬振長綏丹陛羅羣英匪才慚寡用高步羨芳聲
盛年志

四海豈徒夸令名

朱 澗 四首

澗字必東莆田人嘉靖癸未進士授湖廣道御

史建言廷杖放歸有天馬山房遺橐 林雨可云損巖下筆清健一種

疎宕之氣足以移人性情

詩話興國太后將至禮部議由東安門入覆議由大明左門入張璠曰雖天子必有母也焉可由旁門入乎於是從大明中門入在永陵意中惟知有興國太后而已嘉靖三年值慈壽皇太后誕辰有旨命婦免朝賀損巖上言興國太后朝賀既已舉行慈壽誕辰乃聞報罷事體相類禮數頓殊臣切念武宗上賓蒼生無主當時為孝廟後者惟慈壽所欲立爾手提神器親授吾皇孝宗在天之靈所以望陛下之事母后者何如天下臣民之心所以望陛下之事母后者何如今乃旬月之間一舉一罷彼此相較形迹太分何以慰孝宗在天之靈副天下臣民之望疏入永陵震怒匪蔣文定力救不能生矣同時疏諍者馬侍御明衡也二公可謂格君心之非者損巖詩無俗韻誦之想見其人

歲暮山中

種梅山逕邊下有牛羊道童豎恣攀翻糾纏易枯槁殷
勤謝鄰翁愛此寒花好放牧須前山前山足豐草

飲黃石友人黃正可晚青亭和師山題壁

漫影落名山歲月累云周如何咫尺地茲亭今始游小
草冒庭戶寒花明牆陬撼撼高樹聲蕭然似林丘西風
天欲暮雨意鳴靈鳩主人有好懷開尊更獻酬相與各
賦詩談笑銷百憂愛此同游人俱維靜者流盍簪誠足
樂萬事吾何求

贈豐山陳于廷

我愛豐山無俗韻時時來往小齋中野情自比天隨子
詩句多師陸放翁環堵蕭然無一物才名早已動諸公

長吟盡日不知厭興入冥冥海上峰

草堂前芙蓉正吐口占

清霜一夜老蒹葭牆角芙蓉漸著花猶憶昔年江上看
西風吹夢客思家

盧襄一首

襄字師陳吳縣人嘉靖癸未進士官職方郎中
有五塢山房橐

一谿

一道縈村曲何年有此谿微風生細浪過雨失平堤漁
漁舟相續仙源路不迷幽棲我亦戀夢繞石湖西

狄冲七首

冲字仲虛溧陽人嘉靖癸未進士歷官南京工

部郎中有春谿集

陳山父云春谿思致雋爽
體裁各軌其度音調亦迥

詩話春谿歷仕不達晚乃為郎故其詩云官衙四轉轉萬里
垂老始博尚書郎其詩清澈類楊夢山特全篇合作者少

臨淮思

淮之水兮清且瀏思若人兮情夷猶逝予舟兮夕逝願
從之兮靡由淮之水兮清且駛思若人兮不能已抱多
病兮焉投隔淮湍兮千里淮之水兮洋洋睠我情兮難
忘永悠悠兮冬夕輾轉反側兮未央悲莫悲兮生別離
我思君兮君不知臨北風兮隕涕屬孤雲兮南馳

東寺竹

林鳥已春聲林竹尚寒影豈無竹外花愛此晚色靜寒

明詩經卷三十一
蘿拂苔石透手弄清冷飛鼠迭相竄驚鱗時一逞慙非
海上翁動物見猶警

自銅仁至八盤

岩堯度修坂窈窕穿林木野燒楓半枯陰厓草全綠獸
鋌或衝人鳥嚶如度曲羣猿不畏人聯臂下江浴人言
此道險欣籍吾方足肩輿吟且眺一一得所欲月出江
上峰夜上峰頭宿何似長安塗飛埃眯人目

德州道中

遠道嗟難到舟行觸凍流山城寒擊柝客夢夜封侯岸
鳥棲還警村猶吠不休篙人真楚產助力發蠻謳

谿上

原樹明殘日谿風掃斷雲衆山圍野竝一水向田分魚
戲推萍轉樵歌隔嶼聞隱居逢此地無事歎離羣

冒雨入白鹿

樹杪雨來風有聲肩輿且竝樹邊行路傍鳥去葛花落
水面魚游蓮葉生山接流雲多變態澗添行潦亦爭鳴
此來老子興不淺巾折衣霑踏草坪

喜晴

東郊奄奄雨意足南郭浮浮雲脚收鷓鴣刷翎水北岸
蜘蛛添網門西樓虹垂古澗青紅氣日射蒼波紺碧流
曾苦妨農何事喜桔槔閑卧夕陽洲

柯維騏 二首

維騏字奇純莆田人嘉靖癸未進士官南京戶

部主事有藝餘集

謝山子云先生閉戶五十年放意著述自成一家詩以積學勝人不易託

詩話宋遼金元四史惟金史差善其餘潦草率率豈金匱石室之所宜儲希齋撰新編會宋遼金三史為一以宋為正統遼金附焉升瀛國公益衛二王子帝紀以存統正亡國諸叛臣之名以明倫列道學於循吏宋史之暇作也先是揭陽王昂撰宋史補台州王洙撰宋元史質皆略焉不詳至柯氏而體稍備其後臨川湯顯祖義仍祥符王維儉損仲吉水劉同升孝則咸有事改修湯劉臺尚未定損仲宋史記沉於汴水余從吳興潘氏鈔得僅存然三史取材紀傳則曾鞏王偁杜大圭彭百川葉隆禮宇文懋昭編年則李燾楊仲良陳均陳桎禮樂則聶崇義歐陽脩司馬光陳祥道陳暘陸佃鄭居中張暉職官則孫逢吉陳騭徐自明輿地則樂史王存歐陽忞稅安禮王象之祝穆潘自牧著錄則王堯臣晁公武鄭樵趙希弁陳振孫類事則徐夢莘孟元老李心傳葉紹翁呂中馬端臨趙秉善劉祁述文則趙汝愚呂祖謙諸書具在以予淺學亦曾過讀其他宋金元人文集約存六百家郡縣山水志以及野史說部又不下五百家及今改修文獻尚猶可徵予嘗欲據諸書考其是非同異後定一書惜乎老矣未能也

別黃道卿

繁霜肅野草迴颺振城樹胡為子遠行但茲歲云暮我
屨不出門為子臨岐路子驂亦暫停豈不以我故我如
蒿下鳥子如雲中鷺動息各有宜安得長會晤會晤不
須期努力慰所慕

宏路驛

雨歇江天淨山迴驛路遲客愁新歲減風物故鄉宜花
事餘梅蕊樵歌綴竹枝祇慙司馬病深負好文時

豐坊一首

坊字存禮鄞縣人嘉靖癸未進士除禮部主事
以吏議免官家居坐法竄吳中改名道生字人

翁有南禺集

張惟靜云存禮質稟靈奇才彰卓詭論事則談鋒橫出摘詞則藻撰立成士林擬之鳳毛藝苑方之

明詩綜卷三十九
逸駟然而性不諧俗行或盤中片語合意輒出肺肝相啗睡毗蒙噴即
援戈矛相刺亦或譽嫫母為嬋娟斥蘭荃為蕘菜苟若無人罕所顧忌
知者以為激詭不知者以為窮奇也由是雌黃間作轉相詆謔出有爭
席之夫居無式閭之敬鶉衣繼縷濕突不炊僮奴絕粒而逋亡賓客過
門而不入頗頹窮獨以終其身不亦悲夫 王元美
云豐道生如沙苑馬駑駿相半恣情馳騁中多敗蹶
詩話南禹釋褐後從其父學士熙諫大禮受杖闕下人方謂學士有子
矣逮父卒成所乃言非父本意忽走京師上書請追崇與獻王宜稱宗
入太廟永陵用其言而不錄其人也歸益狂誕恃才傲物作偽欺人撰
子貢詩傳申培詩說魯詩世學古書世學石經大學竄易經文別裁異
議一時若泰和郭氏京山李氏澄海唐氏多惑之而不知本邪說也芝
園一序可當聲罪儆而憐才美意寔寓其中此等人第作犬豕相遇可
耳詩不必存錄而論列
之期以祛後人之惑也

十月十一日作

去國已逾紀玄節及茲臨修軌忽電逝壯懷終陸沉淒
淒寒露結慄慄悲風吟芳草委遙澤驚鳥翔空林朝飛
尚蠅羽夕寐惟蟲音馳情有斷簡卒歲無重衾餘悰奚

足道雲海勞子心

明詩綜卷三十九

明詩綜卷四十

小長蘆 朱彝尊 錄

西湖 馮念祖 緝評

龔用卿 二首

用卿字鳴治懷安人嘉靖丙戌賜進士第一除
修撰歷諭德終南京國子監祭酒有雲岡集

武卮第五曲謁紫陽精舍

九曲清溪流此地適居半上有丹屏圍下有綠波渙嘉
木雜異草神工留奇觀山川洩幽靈晦明定昏旦茂圃
小可耕淺渠清可灌我來謁紫陽維舟楊柳岸懷賢式
居廬訪舊窮考按釣游本夙心歷覽騁披翫元理固予

會奈此浮名絆行當息塵網永作青山伴

冬日飲九山負外怡薰樓

開軒對南山蒼翠日在眼山色佳有餘引領意無限煙
霏起暮容浮雲自舒卷時見登山人歷歷諒非遠層樓
具盤餐主人興不淺清歌遶画梁冥心栖絕歎玄理儻
予會幽懷從此遣

蘇祐 二首

祐字允吉一字舜澤濮州人嘉靖丙戌進士除
吳縣知縣再知東鹿徵授監察御史出為江西
提學副使遷山西叅政陞大理少卿以僉都御
史撫保定以副都御史撫山西入為刑部侍郎

尋以兵部左侍郎總督宣大進兵部尚書削籍

尋復官有穀原詩集

朱中立云穀原所作格不高而氣逸調不古而情真 穆敬甫云公意興甚高

得句不苦自是盛唐遺韻 于無垢云蘇公詩道麗典雅卓然名家 陳臥子云司馬詩沉雄雅練邊塞之篇不媿橫槊七律格律精嚴聲調

清亮吐吐 逸羣而上

聞磬

榆塞傳刁斗經年未罷兵遂令青海箭復度白登城四
野空多壘三軍孰請纓轅門有頗牧萬一早留情

予歸入倒馬關作

南風吹雨傍關來關上千峰画角哀老去尚憐金甲在
生還重見玉門開鷓鴣絃謾引思歸調虎節空慚上將才
聖主恩深何以報車前部曲重徘徊

張 整 一首

整字濟甫南昌人嘉靖丙戌進士改庶吉士累官南京兵部尚書有遷鶯館集

訪趙元戎築塞

走馬黃龍府觀兵細柳營連山邊雨合平野陣雲橫松
漢懸秦壁燕支動漢旌猶憐趙克國辛苦築金城

陸 邨 五首

邨字秀卿嘉善人嘉靖丙戌進士累官右僉都

御史巡撫河南有箕山集

李元實云箕齋詩文發乎中情根之理道無高論無詭詞淡然

如菽粟之味可嗜而不可厭 陸子餘云箕山言志為詩罔非真響處華腴而不謝當阻阨而不挫敘逸豫而不淫宣伊鬱而不激靜志居詩話嘉靖初吾鄉詩人漸山而外有青山箕山漸山集選家恒多采錄兩公詩或見遺璧諸圖繪漸山月青兩公水墨鑿貴者好有不

同非画品
有高下爾

感述

行人牽牛去乃謂邑之人無妄固有疾勿藥戒諄諄所
以君子徒兢兢慎厥身明期無人非幽欲無鬼嗔不虞
譽方恥求全毀非真浮雲翳白日白日豈終淪

築隄謠

彼田高我田低高田積土河成蹊低田年年催築堤築
堤復取田中泥去年大水百穀傷高田得熟低田荒今
年土龍雨莫禱高鄉之田為茂艸

宿三义口

雲樹蒼茫合鄉關道路賒近船呼伴侶隔岸有人家艸

短煙橫野江寒月侵沙家人應念我今夜宿三义

郡解似野齋

青林依郡宅渾似野人居幸此無公事閒來展道書蟬聲來遠樹艸色上前除莫笑耽玄寂功名意本疎

弋陽道中

石子船頭磊磊溪聲枕上潺潺人行上瀨下瀨夢隔千山萬山

張子立

一首

子立字原禮黃縣人嘉靖丙戌進士除行人擢湖廣道御史歷官右僉都御史巡撫延綏謫戍

寧武關

龍沙北望接二關十萬旌干虎豹閑隘地風煙臨晉水連營烽火動燕山行邊將帥勞推轂勝算朝廷重轉圜黠寇早聞驅馬去將軍新自射熊還

呂希周

二首

希周字師旦崇德人嘉靖丙戌進士歷官通政司使有東匯詩集

詩話東匯於詩亦沾沾自喜其集不甚傳由其子請論定於陸武惠也同里曹秋嶽侍郎博徵文獻集明三百年名公卿手書墨蹟裝潢成冊多至七百家東匯雜詩在焉比集中所載者較勝亟錄之侍郎歿後古林書畫散作雲煙曩之過眼者不復再覩矣可惜哉

雜詩

人生如萍藻汎汎浮江河東西逐流風南北信逝波波逝一以散風迴復來過暖翠啞鳧鴨遙青逼蒲荷託身

一水中漂轉諒靡他深谷忽為陵天運其如何枯瘁同
百草無復黃白華植根本無定浮榮安足多

萍鄉次趙都諫漸齋

晚憩萍鄉館繁陰度短墻鳥栖人亦倦山僻雨初荒新
月憐游子涼雲夢艸堂好風三百里吹我上瀟湘

華察十一首

察字子潛無錫人嘉靖丙戌進士選庶吉士改

戶部主事歷兵部郎中再改翰林修撰遷侍讀

學士掌南院有巖居橐黃才伯云鴻山詩追踪陶杜卓然大雅王僅初云學士詩壹意冲淡調出天成語皆心得王道思云子潛詩灑然自立於塵壒情累之表意象之超越音韻之凄清不受垢氛而獨契冥濤王元美云華子潛如磐石疎林清溪短棹雖在秋冬之際不廢楓橘龔鳴治云韓子云和平之音淡薄愁思之音窮渺鴻山搯和平之音而得空渺之趣可

謂兼才宗子相云學士詩雅淡有靖節風蔣仲舒云學士刊洗浮靡獨秀本色誠陶韋之妙境也惜才具稍乏短於七言袁魯望云先生詩根乎性真妙乎言理冲粹清英不可境界李本寧云學士五言有陶韋之致鄭平子云鴻山幽情秀句不減王孟陳臥子云子潛清儉似茅茨下人李舒章云子潛如坐禪空山微聞鐘磬詩話學士豐於貲纖纖務晝夜持籌不知吟咏性情何由超詣乃爾

游善卷碧仙巖

落日下空門齋鐘出林莽偶茲叩精廬再宿翠微上舊

游不知處但見松杉長巖虛露氣清坐覺心魂爽月白

山窗高夜靜風泉響遂令寤寐中超然脫塵網雲壑永

棲遲願言稅歸鞅

夏日山中述懷

晚來慕恬曠適意在罷官取涼喬林下晝日恒不冠白

雲滿前峰曳杖行獨看有時遇鄰叟烹茶共邀歡山田
固云薄歲入亦自寬達人貴知足吾生永相安

僅初移家湖上有作和韻贈之

城邑豈不美生事在田廬移家就所安正當長夏初壘
上刈舊麥園中灌新蔬寧卹四體勤將期方寸舒入門
謝鄰里幸託仁者居湖光近林牖水月澹清虛因適魚
鳥性遂於塵跡疎開軒聊種竹閉戶兼著書豈羨衣食
饒但喜歲月儲達人能固窮朝夕恒晏如願言日相過
多聞時起予

五月望夜與諸君山中再酌和僅初韻

仲夏苦晝永薰風起將夕圓景海上來照此山中客坐
令微暑消兼使衆累釋興至時命觴露下復移席因耽
水竹居遂同魚鳥跡盤遊豈忘返翫物聊取適臺空人
影疎夜靜潭氣白參差樹杪峰歷歷辨咫尺超然悟真
境萬物一虛寂

晚至湖上和僅初韻

山中讀書罷來憩澄湖濱綠陰暗溪路草堂靜無塵平
生滄洲意煙波夢垂綸石梁度落景花渚藏餘春閒情
狎魚鳥悠然適吾真雲天澹晴霽空水明衣巾未遂乘
桴願徒懷江海人

宿玉陽山房和僅初韻

返照明溪梁深松晦夕景岩臥符夙期雲陰石牀冷因

明詩紀卷四十一
六
投物外心遂入清虛境天寒木葉疎月落山房靜然燈
獨不寐秋宵一何永明發從此辭白雲鎖蒼嶺

秋日觀稼樓曉望

日出天氣清山中悵幽獨登高一眺望風物淒以肅流
水映郊扉炊煙散林屋秋原一何曠薄陰翳叢竹時聞
鳥雀喧因念禾黍熟悠悠沮溺心千載猶在目

秋晚過英姪園居

野曠秋氣高丹楓映茆屋農家各欣欣門外山田熟相
邀具雞黍悠然入深竹風物日蕭疎但見籬畔菊賞心
愜所期勝事良已足落景照湖光孤亭暝巖麓

寄蔣子雲

我家大江南君家大江北平生弄篇章白首不相識曩
聞大雅音因窺作者闕一從罷官歸壟上親稼穡口誦
南華經意象欣自得有時江月來照見天地色神交入
夢寐道遠安可即雁去爲寄書殷勤問眠食

秋日施子羽姚山人見過

掃徑秋色佳衡門遲來客山厨薦園蔬戀賞淹日夕荒
臺蔭叢桂徙倚對巖壁夜靜人意閒潭空月華白信宿
愜所期去住欣自適養生慕彭聃學道窺莊易願言保
微尚歲晚成三益

僅初以詩見寄次韻答贈

地僻畏風雨入春長掩扉一從還山後又見梨花飛世

事多貝錦故人猶布衣
瑤琴勿輕奏山水知音稀

屠應竣 七首

應竣字文升平湖人嘉靖丙戌進士選庶吉士

改刑部主事調禮部歷負外郎中仍改翰林修

撰陞侍讀進春坊右諭德有蘭暉堂集 俞汝成云漸山詩明

爽俊偉 穆敬甫云屠詩深重不浮得唐人應制體 陳臥子云屠公典麗流暢亦足名家 李舒章云文升風姿間麗如玉樹風前是戶庭

物佳

詩話諭德取材六代具體初唐爛若春葩將以秋實是衆作之有滋味者

贈袁子永之戍湖州

弱齡事篇翰與子諧所歡同芳握蘭茝偶德與與璠彈
冠入鼎門振衣陟華軒皇心苟予顧白首諒無慙風波

起中道行路一何難子行戍故越予留滯幽燕孤雲易

流邁獨波不成瀾艱危各異勢繼綫何由宣贈子別鵠

操報我以孤鸞

贈內

良時飭徒御予當遠行游上堂戀慈親入室語好逑王

臣奉時役不得顧晨羞攜手再三歎出門悵悠悠室中

四五雛眷眷何能留遠期在終歲忽往增離憂離憂安

可任迢迢隔辰參蓂蓂雙鯉魚一浮而一沉楚橘不北

徙越禽有南音贈子明明鏡可以鑒我心

馬上贈武舉生金寶 有序

金寶以歲庚辰舉武試時學士石公瑤為考官

明言總卷四十一
今廿年餘矣猶以敝衣走風塵中兵憲陳君令
護予行予憫之爲賦長句

翩翩飛騎突且雄橐垂七尺高麗弓向予長跪馳素封
來自天津陳長公感君來緘重君使汝才且雄者誰子
云是熊峰門下士緋衣已隨塵土緇壯心尚逐風雲起
長公好士輕黃金求才不憚幽與深幕下立談收劇孟
坐中飛檄佇陳琳白髮自知無長物清商猶自有哀音
我聞其言感且歎古來相士輕貧賤驛驢豈少伯樂無
世上紛紛寧足羨曾冰皚皚黃河枯策勲報恩真丈夫
插貂橫玉盈上都封侯之骨汝有無贈汝腰間金僕姑
贈同年謝子儒致仕歸蜀

子真棲谷口潘岳賦閒居長揖辭明主爲農返故廬雪
消巴嶺出天入錦江虛莫待場雄老潛夫早著書

趙武庫元實移居賦得堂字

高士便疎曠居臨御苑傍開尊秋月滿列樹夏雲凉水
鏡搖朱戶風琴奏石房登樓新有賦王粲謝升堂

漫興

南風吹晝沙霧黃遠在燕臺思故鄉火雲炎日暑三伏
江檻野亭天一方即愁蠅聲惱饒睡况有客子來相妨
行歌抵暮遲明月柏林露葉鱗鱗光

鏡光閣雨

鏡光閣在帝城邊遙控西山莫北川忽有風雲來絕塞

坐看雷雨下諸天微茫野色俱堪画
澗沅中流好放船
東下林塘更幽絕江南秋望此依然

王格一首

格字汝化京山人嘉靖丙戌進士選庶吉士出
知永新縣陞刑部主事調戶部歷負外郎中出
為河南僉事會南巡行宮火逮獄削籍久之授
太僕寺少卿有少泉集

顧華玉云少泉取材于選効法于唐諸體皆工詩話少泉矢口信筆不費推敲合作者寡并非洞庭漁人之比南風自此繼夢澤而代興者鮮矣

燈夜曲

千金一刻此芳春况復天邊月色新
曲巷小橋隨意去
明燈何處不留人

陸粲八首

粲字子餘一字浚明長洲人嘉靖丙戌進士選
庶吉士改授工科給事中坐劾張桂謫都勻驛
丞遷永新知縣有貞山橐

顧玄言云給事與屠文升袁永之王汝化同時入館並有盛名亦李唐四傑之流

詩話嘉靖間元老類皆延攬賓客雖貴谿分宜亦然惟張桂專與文士為讐丙戌庶常一筆盡掃貞山又多論劾困抑終身然晚極田廬文酒之樂菽園著述傳誦藝林比之二柄臣孰得孰失邪

擔夫謠

擔夫來擔夫來爾何為者軍當差朝廷養軍為殺賊遣
作擔夫誰愛惜自從少小被編差垂老奔走何曾息祇
今丁壯逃亡盡數十殘兵渾瘦黑可憐風雨霜雪時凍

日言終卷四
十一
餓龍鍾強驅逼手搏麥屑淘水餐頭面垢膩懸蟣蝨高
山大嶺坡百盤衣破肩穿足無力三步回頭五步愁密
箐深林多虎跡歸來息足未下坡郵亭又報官負過朝
亦官負過暮亦官負過貴州都來手掌地焉用官負如
許多太平不肯恤戰士一旦緩急將奈何噫吁噫一旦
緩急將奈何

贈別王直夫

二首

商飈激疎牖蟋蟀鳴墻陰志士恒感秋况乃違所欽之
子役王事遠適閩江潯攬衣起追送渺彼川塗深少小
從子遊方軌馳文林時去志願違素髮忽滿簪撫景慨
今昔惻愴情難任願言顧離索惠我瓊瑤音

威鳳天際翔潛虬澤中蟠嚴子時閉肆貢公乃彈冠顯
晦豈必同各以性所安子行樹遠績奮身青雲端鄙人
棲蓬藿蹇拙聊自完丈夫志千載飛沉何足歎相期保
貞素歲晚同金蘭

憶家君

白髮人千里朱門月半扉燕山雲去遠澤國雁來稀無
夜不成夢有書空道歸遙憐北風勁尋便寄寒衣

林若撫
云先生

七歲
時作

寄葛太守子中

憶爾投荒日依依戀翠華亦知行萬里不是為丹砂郡
古留銅狄堂深繡土花何須憂瘴癘只合臥煙霞

送陳太僕謫教海陽

蠻中千嶂啼猿裏海畔孤城匹馬過却望瀧江更南下
月明雙淚聽尺歌

送人入蜀

樓船捩柁浪花生百丈雙牽黛色明夾岸兒童齊笑語
嘉陵江似使君清

送汪僉事之湖南

驄馬長鳴飲碧流銀鞍金絡紫茸鞦一作花銀鏤帶鷓鴣裘行人大別
山頭望雲外雙旌指鄂州

石文睿一首

文睿字文思台州寧海人嘉靖丙戌進士除太

嘗博士有白山集

詩話文思詩未成家然如寒生紅葉雨秋老白蘋江高塔靜觀塵土界老僧間數廢興年正是不俗

郊行和韻

雲散峰晴海角樵聲牧唱山根客喚潮來石渡烏翻花
落蓬門

江以達一首

以達字于順貴溪人嘉靖丙戌進士授刑部主
事歷郎中出為福建僉事轉湖廣提學副使有

午坡集

詩話午坡以北地文出廬陵眉山之上又謂昌黎詩不逮文尚沿習氣胥臺贈詩云賦窺宋賈室詩登潘陸堂不免阿其所好矣

夏日偕東沙赴練塘北園之遊

佳辰愜行遊以我心所賢來登山上亭共聽風中泉因
坡展瑶席坐石藉芳荃蟬鳴高樹林涼葉墮我前脫巾
謝塵鞅箕踞臻忘年緬彼域外觀息此區中緣

聞人銓一首

銓字邦正餘姚人嘉靖丙戌進士除寶應知縣
擢山西道御史巡視兩關歷湖廣按察副使有

芷蘭集

詩話邦正著錄陽明之門撰飲射圖解又雕劉昫舊唐書行世
津津好古不易得也句如花落雨餘風吹寒食寒情味不淺

登北固山

郭外青山好高峰俯碧霞江聲入尊竿秋色滿汀沙島
嶼金焦並人煙市井賒地偏鷗鷺狎擬宿梵王家

田汝成五首

汝成字叔禾錢塘人嘉靖丙戌進士授南京刑
部主事繇負外轉禮部郎中出為廣東提學僉
事左遷滁州知州陞貴州僉事遷廣西左叅議

有豫陽集

顧玄言云學憲詩沉鬱豪縱如
探珠合浦夜光迫人往往眩目

詩話叔禾挾黃勉之徧游武林諸山互相酬和撰西湖遊覽志及志餘
亦稱好事惜中興館閣錄都城紀勝武林舊事夢梁錄咸淳臨安志大
滌洞天紀諸書皆未寓目未免挂一
漏十耳詩品在范菁山江午坡間

白石屋洞至法相寺同黃勉之

曠志憶逍遙勞歌厭囚窘縱壑媚春鱗薄霄媿秋隼厭
彼方內遊夙此塵外軫每挹山水輝都使名利盡煙樹
杳芊綿雲峰互虧隱崖屋已靜便祇園復恬引金輪相

自圓玉鏡光猶蘊沉照燭靈根依方護玄準理會得有
充神開暢無朕雖牽纓組心亦免丘壑晒

軍中酬焦學憲過予思南別署有懷見寄

誰道軍中樂徒勞物外吟朔風淒鼓角嘉節罷登臨
閣依山迥江梅映雪深無由欵高駕愁絕暮雲心

烏蠻灘

一葉中流下千山兩岸開鼉鼉吹浪轉燕雀受風迴
石迎船出啼猿近客哀從來輕險絕涉此寸心摧

龍江送吳士美移守鈞州

蘆荻蕭蕭鴻雁飛清江石郭重因依孤舟尚憶他年別
萬死還從去路歸白首丹心憐汝在窮途青眼故人稀

量移猶是長沙謫落日哀歌事轉非

韶州

河戍寒依浦村氓晝掩關隔山明野燒云是小溪蠻

樊鵬 六首

鵬字少南信陽人嘉靖丙戌進士歷官陝西按

察僉事有樊氏集 少南師事仲默其論詩一以初唐為宗原本仲默也

詩話望之少南同為仲默鄉井繁短論長少南差勝

楊白花

楊白花一夜風吹去知他飛飛落何處金屋重重閉不
開哀鴉啼盡宮中樹

於郎中足賦卷

官軍日食十萬粟邊城財賦苦不足大同宣府鄰封疆
千里極目皆沙場朝廷北顧垂至計馬飢軍餓憂不細
於君自出居庸關藟糧堆積高如山官軍無事日牛酒
偵騎聞之皆北走

寄袁雙溪

聞汝行塵在南陽定汝陽古城遙落日岐路滿秋霜鴈
影江流隔猿聲楚澤長賈生官不達莫怨漢文皇

六合

聯轡來東邑朝來暮復還市廛通亂水城郭帶秋山路
出青楓外江流白霧間西行鄉思切愁絕望昭關

五丈原

英雄久已矣霸跡至今存為惜三分國愁看五丈原春
雲浮戰壘野柳暗營門潏潏金牛道誰招萬里魂

賢隱寺宴別張子言限字

寺門縹緲立孤雲雲裏鐘聲落澗聞白晝蛟龍時並見
青山麋鹿晚為羣窗中碧霧千峰濕樹杪香泉百道分
明發長安萬餘里落花尊酒暫留君

袁

袁

十九首

袁字永之吳縣人嘉靖丙戌進士選庶吉士改
授刑部主事調兵部坐失火下詔獄謫戍湖州
用薦補南京兵部員外出為廣西提學僉事有

胥臺橐

文徵仲云永之樂府古律詩莫不合作吳峻伯云永之
古詩法魏晉近體擬唐當其意到一騁敷贍沉核無所不

剽而動與作者合度 王元美云袁永之如王謝門中貴介子弟動止可觀 蔣仲舒云袁詩如築城建邑位置整嚴終之悠然之思 詩話永之詩品在后岡之上足與吾鄉漸山方駕報顧東橋書云立言之道其難有六學難乎淵該事難乎綜覈辭難乎雅健氣難乎冲和識難乎貫融志難乎沉澹兼是六能而假以歲月庶矣古之立言者率多中歲蓋少年輕俊聞見未廣計慮未周詞鋒則銳而論議則捷終乖軌轍今讀香臺集多中歲之詩宜其聲既清會辭亦藻拔也

移居峴山精舍

山寺閔精廬移居性所適寧知賓客稀漸與城市隔岡巒何秀美蒼翠還日夕夏木密以陰幽鳥來几席開窗見漁舟湖水清且碧焚香日晏坐遣興在篇籍余本迂散人禪林亦靜僻茲焉遂吾好已矣思屏跡

題盧師陳所居五塢山房

吳邦表靈隩山水蘊清嘉緬惟南橫勝玄邃誠難誇飛泉懸白雲壘嘯棲頽霞連岡盡叢竹密塢多桃花信美可以居僻性思移家君家南橫側搜討窮幽遐俯臨北麓峻曲抱南湖斜丹房闕芝朮列墅羅桑麻既寡徵稅憂兼無城市譁茲樂寧外獎珪組亦何加

觀魯迭所貢獅子歌

魯迭迢迢遠在崑崙西叩關通道貢後猊絕漠知重幾萬譯跋涉流沙經月氏初從羈縻就屬國傾城聚觀途路塞攣題械脰苦維繫豹鞞為鞞鐵銜勒尾如流星氣憑陵隅日燭地思奔騰四蹄蹴躡毛髮竦瘦脊碑兀排鋒稜崩雷掣電望風吼青兕辟易玄羆走嗇夫股栗不敢前壯士變色將無徂奚奴綠髯深眼睛戟手魑髻垂

胡纓須臾輟引藁街下俛首帖耳猶長鳴割羊屠狗恣
所欲豐芻肥哉日不足英雄束縛亦如此豢養恩深敢
辭辱始知丹青貌不同彷彿山海圖經中上林已開射
熊館天子賜見長楊宮虎賁如雲兵衛列疆弩短刀防
噬嚙詔謂圉人破檻車玉階舞蹈龍顏悅我聞異物不
可馴袒裼擾之如有神水衡寶鏹勅頒賜不惜金錢懷
遠人嗚呼明王慎德卑遠略珍禽奇獸須教却周征白
狼荒服叛漢閉玉門歌頌作先朝故事傳敬皇魯迭欵
塞曾來王當時謝却仰明聖萬古史冊生輝光今皇端
拱勤內治夷德無厭惟嗜利何當破械縱山林厚賞金
繒絕來使

送陳少叅魯南之江西

金章荷聖恩辭出大明門驛路雲千里都亭酒一尊康
郎城邊春水發滕王閣上懸新月輕帆直下疾於飛幾
日看山遍吳越楊雄白首薦公車曾作詞臣侍石渠直
道自甘終放棄高才誰肯借吹噓藩叅四品官不薄豫
章猶勝長沙惡簿書錢穀亦何勞十載功名至方岳春
來彭蠡鴈難聞江州江花香暮雲南歸正及鱸魚美直
北相思不見君

送陸子玄遊秦嶽

有客手珮蒼精龍告我遠遊登岱宗岱宗根蟠九百里
絕頂上有秦時封金泥玉笥秘難見古文奇字誰能辨

明詩歸卷四十一
日觀遙看碣石津雲峰正對蓬萊殿海中鰲身應天黑
三山湧出神仙宅貝闕參差結蜃樓珠宮掩映藏蛟室
君登秦嶽觀滄海九州四瀆皆安在堂上遺音想絲竹
壁間經傳尋魚亥丈夫所志在蓬桑焉能局促籠中藏
看君一劍行萬里五嶽之遊自茲始

大駕視牲南郊

大路調仙馭朱旗列禁城帝牛三月繫田燭九衢明日
並龍旒出山將綵旄迎橫汾卑漢詠裡祀秉皇情

人日齋居雪霽

瑞雪逢人日堯年感物華水從銀漢落山繞玉關斜帳
殿披晴靄郊宮闕綵霞今朝禁城望無樹不飛花

蒼梧作

氣候南荒異蒼梧濕更饒山雲晴忽雨江霧夜連朝病
與炎俱劇愁隨瘴不消故鄉那可望桂嶺已迢迢

憶橫塘別業

一臥文園病終朝念故山敢希宣室召祇望玉門還橘
想千頭足桑思十畝閒如何五斗米猶自滯南蠻

謁柳祠

羅池非昔日柳廟亦荒頽秋艸重門閉寒花獨樹開文
章真命世今古孰憐才猿鶴如相訴松風晚更哀

謁劉賢良祠

高樹臨流水空庭澹夕陽萬言翻下第三黜竟投荒事

業存青史英靈儼白楊古來稱屈者不獨一賢良

自柳至平樂書所見

鬱白方言似潯梧瘴氣賒蚺蛇晴掛樹射蜮晝含沙屋
覆湘君竹山紅蜀帝花夷堅收未盡博物待張華

招鶴

獨鶴忽飛去冥冥滄海東離哉翻羽翼幸矣脫樊籠影
憶空庭月聲鄰別院風凌霄自有志吾豈學支公

送陳德夫使魯

帝曰封同姓皇華送使臣河山藏漢誓寶玉展周親殿
說靈光古經傳孔壁新余生好文獻一為訪先民

送何給事善克守衡州

衡陽楚上流太守古諸侯五馬橫金去三湘露冕遊猿
聽巫峽夜鴈數洞庭秋今日辭青瑣還將諫州留

秋興

仙仗行宮舊內居花間往往駐鸞輿徒聞漢帝橫汾曲
不見長卿諫獵書天子射蛟開水殿奚官牧馬遍郊墟
蒹葭苜蓿秋無限悵望燕雲萬里餘

登匡廬山

峒峒廬嶽近天都萬丈丹梯鳥道孤樹裏泉聲飛瀑布
空中煙霧起香鑪峰形下瞰蓮花嶺江勢遙吞彭蠡湖
白鹿仙巖何處是却看五老在虛無

采香涇新莊

誅茅闔闔城之西路轉采香涇上隄濃陰榆柳綠當戶
秀色芙蓉紅滿谿力田輸稅半栽秫鑿沼養魚兼灌畦
每媿長公高隱志杜門從此可幽棲

張摯字長公

西蘆辭

君家滄瀆城城西蘆子渡蘆子何蒼蒼秋風吹白露

范言四首

言字孔嘉秀水人嘉靖丙戌進士授蒲圻知縣

改保定儒學教授歷國子監丞陞大理府同知

有菁陽集四音存藁

湯義仍云菁陽質有其文孤秀清贍陳仲醇云菁陽詩文深往獨至最合古

法

詩話菁山先生不畏強禦為國子監丞時嚴世蕃著紅袴入上舍先生夏楚撻之分宜次日造門謝未幾而大理丞命下矣嘉靖初吾鄉稱詩

必以先生為巨擘屠諭德漸山長歌云菁山先生真崛奇文章垂世光陸離懸黎結綠世莫識陽春白雪和者希是時漸山詩名籍甚顧入室

稱弟子焉

駕出北郊

清蹕辭南陸玄宮禮北郊周廬屬霜戟行吹雜金一作鏡

齋祓陳周幣明禋薦楚茅還聞天樂在縹緲下雲旂

別華鴻山翰撰

細雨花邊路閒亭竹外扉地偏亭榭古春老燕鶯稀柳
色侵歌扇藤稍拂舞衣新愁忽高會知爾遠懷歸

鶴樓別意

吹笛高樓月色新不知江上有離人柳條欲折可憐暮
梅花即開何處春孤舟泛泛剡溪雪落日迢迢揚子津

天涯我亦索居久爲汝長歌一愴神

曉發吳江

垂虹橋邊曙色微三高祠下露華晞画船打鼓出城去
秋水滿江鴻鴈飛

趙時春 二首

時春字景仁平涼人嘉靖丙戌進士選庶吉士
改兵部主事以建言下獄尋補翰林編修又以
上疏放歸會邊警起領民兵自副使超拜右僉

都御史巡撫山西有浚谷集

李伯華云浚谷詩有秦聲
浚谷伸紙行

墨滾滾而出伉浪

自恣不嫻格律

詩話景仁慨當以慷

如擊唾壺不必中節

送陶虞卿赴神機叅將

宋殿三衙帥唐環十六軍官聯叅斗柄旌旆儼星文羽
衛迎黃道龍光覲紫雲時時仙仗入清蹕早應聞

留滯

留滯滄洲已浹旬鷓冠終日滿風塵浮雲何事來還往
歲月無情秋復春海甸中宵來驛使天涯盡處未歸人
不堪對酒翻惆悵翠篠黃花幾度新

王慎中 十七首

慎中字道思晉江人嘉靖丙戌進士除戶部主
事改禮部復改吏部歷負外郎中謫常州通判
稍遷南戶部主事轉禮部負外陞山東提學僉

事歷江西叅議河南叅政有玩芳堂摘稿遵巖

家居集

王元美云王道思如驚弋宿鳥撲刺道迅殊媿幽閒之狀

道思詩體初宗豔麗工力深厚歸田以後攬

雜講學信筆自放
略與唐應德相似
詩話劉淵材憾曾子固不能詩余嘗見宋人所輯唐宋八家詩韻則子固與焉不得謂非詩家矣評明人詩者不及王道思然道思五古文理精密足以嗣響顏謝而論者輒言文勝於詩非知音識曲者也

遊西山

良辰戾首夏肅軫遊西山山形何萃律洲渚互相繇奔
湍既下赴危峰亦上千谿劄石洞窈迤邐飛梁懸朱葩
晞陽谷翠羽蔭陰巒閔室象霞構疎蔓憑風騫抗宇凌
層基列楹俯流泉好鳥揚幽音弱藻濯清漣豈惟耽遠
遊因茲達大觀拾乳歷窳窳擷芳陵贊屹渟渟出礧淙

靄靄冒隴煙水碧間清藻靈飈茁瑤管履險神彌豁入
幽情更延隱巖懷子真蹈海期仲連遺形九州外棲迹
萬象顛崇深惟素秉神理迷真詮遊心迓冲漠斯道庶
不諼

山行

鷗夷泛左蠡康樂慕東甌屐泯無續蹤舟沉誰溯流至
人與物化曲士局時謀疑冰晒夏蟲將隨汗漫遊蜿蟺
既沿澗崎嶇復經丘振袂陟危巘解纓濯澄洲石滑時
藉蘭巖蹇或搴樛文芝榮華巔秀穎蔽平疇綠葉藂成
帶漱泉憂如瓊霏霏雲出岫浙浙飈扶輶旨酒盈瑤卮
臨風自獻疇身已塵象超心與灝氣游緬懷羽化客高

舉不可留精搖生乃勞欲淺道則修簪紱爲鞅紕撫已
竟誰尤

秋祀先師恭述

維馨歆歲事有恤恭明神豐功報宜重孔祀典攸敷明
明天子命宣哲協欽文咨惟百工長曰予克宅臣攝事
昭我將奏假具惟寅庶僚旣濟濟多士亦振振肆佾表
殷薦大烹羞明禋格思儼無斃仰止儀自尊大哉聖人
德展爲帝者賓

十二夜月與張子同玩感述

高旻蕩浮翳仲冬淑氣清良夜何未央憩坐臨前楹舒
景揚雲端皓魄委廣庭灑英鮮瑤席華彩鑿雕櫺稍稍
風露重微微河漢明眷茲泰宇寬展席諧芳朞撫景遺
俗迫即事寡氛嬰豈惟祛煩積亦以湛心靈戒盈君子
德和光達士情葆曜貞有孚養晦善自名

普光寺睡起

羣動各有營蹙蹙不得息嗟哉尺蠖徒煩蹇牽物役豈
謂塵中姿還寄雲外跡古刹絕浮氛法堂鮮來客首夏
澹新涼偃臥不知夕覺來盼高峰近遠各異色草搖席
下芳筠散尊中碧鳥語無俗音泉漱皆冽沍俛仰愜幽
賞去矣從所適

登金山口絕巔

地紀控西界靈山亘北甸足弱步履憩崖峭石猶踐枝

明言卷四十一
三
樛迺能援葛脆不可挽當其意象開豈復慮高蹇瞻峰
皆列施陟礪數迴緬稍覺天地寬即看雲煙變石竇芝
自榮林罅雪尚泫興闕無近尋登高有遠見周圻蠹五
雲易水通一線微茫燕趙區歷歷皆可辨長嘯發靈籟
倦坐席苔蘚氛垢苟不嬰沉慮斯可遣

異典

南郊工就冬至前四日上親勤玉輅習郊禮於
壇上威儀卒度周圻咸中小臣從觀其美作異

典

芝壇歛浮景休氣郁昭清晨旭流翠葆泰風颺華旌飛
龍麗重霄蕤綏在 天庭式禮紆皇步篤恭軫聖情几几
碱承烏亭亭雲耀紘秉離臨日鑒乘乾健天行升崇儼
帝對納陛惕陵兢周圻並圓方興俛以屏營萬舞羅臬
帳廣樂隲咸莖度以哲罔忒文用道自弘卒事秩無讐
百辟具維刑疊疊不顯德千載揚徽稱

章丘縣校士六月十七夜月有作因示諸屬

日入羣動息予亦遂休茲稍喜喧濁屏徒步臨前墀仰
見明月出忽與心賞期湛曠神俱王虛明意自宜况逢
時雨霽宿潤含華滋品物各懷榮因得靜中窺始悟玄
寂理寧為躁競知亦有盈尊酒屢進不一持非此莫與
同真賞豈因之

遊大明湖晚至北極廟登覽

春城足遐觀攜手復嘉客欲極高深趣停橈理輕策林
木飛鳥還蒼茫煙景夕返照射巖丹遙空帶水碧山色
晦彌明人聲喧更寂燈火起閭閻漁樵散原澤當歌浩
思盈對酒沉憂釋不知驩娛滯天表生皓魄

遊白鹿洞

素嬰丘壑情況乘英賢想寤寐懸宿心遊盤得茲賞重
陰始晦蒙杲杲旋開朗攬勝據巉巖探奇歷榛莽境閑
百慮空意愜二儀廣野色淨巾衣秋容成物象菊含露
下英泉作山中響柔葉稍朝零剛條非夏長景光易流
徙今古同俛仰躊躇悵回軫何時還獨往

六合亭

亭宇憑虛空結構出妙境攀援藉葛藟毫末凌光景豁
達四天通夷猶雙目騁雲生當正襟風起吹方領泉脈
散千峰湖波澄萬頃煙霏自開斂魚鳥各翔泳即事天
機深忘言外物屏始知世上日不比山中永

遊麻姑山

雲出本無心擇棲多奇巘類予慕真勝涉趣不知遠初
緣碧澗行幾傍丹崖轉林追去虎蹤磴躡飛猿踐泉流
遞淺深巖谷變陰顯歎瀑遇留憩石牀時仰偃桂芳洞
裏秋霞映山中晚探異尋前期入幽忘後反神遊力不
捐理愜情俱遣天路如可梯欲以微官免

餘干道中寄懷江午坡僉憲

湖水日夜綠輕舟隨泝沿肅肅賓鴻羽命侶悲楚天征
人正盈抱坐使憂思牽所思何爲者我友阻良緣昔望
關音容幾經芳歲捐緘素詞難極馳情間山川今來接
面目曾不須吏間四體爲人役從事嗟獨賢倉卒執杯
酒沾脣不下咽新篇何由覲妙理未及詮宿懷如糾結
待子解其纏乍見翻違去持此竟莫宣

侯民部靜溪招遊甘棠湖陪憲使管復齋諸公

積雨夏陰生瀰漫湖水遍悔爲一室拘幸奉方舟宴遠
嶼微出江雜芳正盈甸沿流始泝洄逗浦更游衍樹色
逐橈迴波容隨望變放情魚鳥閒景旻不知晏一杯已
可歡况以偶時彥

洪方洲養疾山中惠訪草堂因而留館

裊裊桂樹枝涼風日將變生色難久留華光苦流轉夫
君如不來胡以慰偃蹇今夕良何夕悠然適我願片雲
本在山出岫亦游行吾園雖蕪沒物意皆疎遠以茲城
郭深豈必山林善開軒散煩促憑檻息步踐新飈起艸
頭白月浮池面蕭閒秋正初徙倚夜方半君自所好殊
疵吝何足眷

訪空同先生故宅

久欲求遺草今來訪故廬北窗存臥席東壁有藏書墨
沼春苔長琴臺夜月虛年年桂花發人擬子雲居

過寧庶人故陽春宮

邪陌轉城闔重門曲水濱人談亡國地花發舊宮春
冷空梁月歌銷積棟塵堪悲當日事議讞帝家親

李元陽 一首

元陽字仁甫大理人嘉靖丙戌進士選庶吉士
除戶部主事擢江西道御史出知荊州府致仕

冬夜

漫漫冬夜長熒熒孤燭光山人自無寐况棲修竹房修
竹夜淅瀝蕭灑吟寒螢朗月照戶庭鳴泉歸故塘別葉
棄寒風餘芳委嚴霜東壁正中昏振衣起徬徨徬徨豈
有他望道吁升堂悠悠歲云暮遐哉猶面牆寸陰與彈
指久近不可量千古在須臾安得不悲傷

何禪孝云此詩有
蘧伯玉及時勉學

之意非留
連光景者

明詩綜卷四十一

